



Qeqqata Kommunia

Utoqqaat pillugit oqaaseqartartup
angalanermini nalunaarusiaa, 2024



Juni 2024




Saqqummersitsisoq: Utoqqaat pillugit oqaaseqartartoq – Josefip aqqutaa 749, 3921 Narsaq,
Kalaallit Nunaat – www.utoqqaat.gl

Saqqummerfia: Oktobari 2024

Allattoq: Utoqqaat pillugit oqaaseqartartoq Kiista P. Isaksen

Nutserisoq: Jensine Berthelsen

Assit: Utoqqaat pillugit oqaaseqartartoq



Siulequt

Kalaallit Nunaanni Utoqqaat Illersuisuannut inatsisitigut tunngaviusoq tassaavoq Inatsisartut inatsisaat nr. 37, 28. November 2019, taaguut 2023-mi inatsisartuni allanngortinneqarpoq imatut: Utoqqaat pillugit oqaaseqartartoq.

Angalanermit nalunaarusiaq manna tassaavoq utoqqaat atugaasa qanoq innerat pillugu oqaaseqaasioq. Utoqqaat angerlarsimaffiini utoqqaat oqaloqatigineqarneri, utoqqarnut qanigisaasut, sulisut, angerlarsimaffimmi ikiorteqarnermi sulisut, atuisut, innuttaasunik ataatsimiisitsinernit oqariartuutit, allat attuumasuteqarsinnaasut oqaloqatigineqarneri aallaavigalugit.

Nalunaarusiaq manna tasaanngilaq nakkutilliineq, aalajangiineq, ilisimatusarnikkulluniit pissusiviusut ujar-torlugit nalunaarusiorneq.

Qeqqata Kommunianut angalaneq pivoq 2024-mi 31 majimiit 7. Junimut 2024.

Angalanermit siunertaq tassaavoq Qeqqata Kommuniani Sisimiuni najuulluni kiisalu Maniitsumi attaveqaatit atorlugit paasisassarsiorneq, Kattuffiup Utoqqaat Nipaataatsimeersuarneranut peqataaneq, utoqqarnik, qanigisaasunik, sulisunik, innuttaasunik kiisalu Kommunimi oqartussaasunik naapitsilluni oqaloqatiginninerit, ataatsimeeqateqarnerillu.

Angallannikkut kinguaattoornerit pissutaallutik akimmiffeqaraluarluta pilersaarutigut tamakkerpagut. Qeqqata Kommuniani nunaqarfinni attaveqaatit atorlugit isigaluni ataatsimeeqatigiisnnaaneq suli periarfissaa-lersimanngimmat kingusinnerusukkut ingerlanneqarsinnaalerpata isumaqatigiissutigaarput.

Qeqqata Kommuniani utoqqaat 150-it sinnerlugit peqataaffigisaanni, Kattuffiullu ataatsimeersuarnerani utoqqarnut atugassarititaasunik paasisaqarlupunga.

Qeqqata Kommuniani utoqqaat atukkamikkut assigiinngitsunik atugaqarnerat maluginiarparput, annertu-nerpaamillu utoqqaat pisariaqartitaminnik ajunngitsumik atugassaqaartitaanertik unnersiutigaa. Ersarilluinartumilli utoqqaat angerlarsimaffianni Sisimiuni nerisaqarnikkut unammilligassaqaartoq paasivarput, ilitsoqqussaralugu kalaallit inuit nerisaanik amigarsineq pinngitsoortoqanngitsumik oqariartuutigineqarmat. Maniitsumilu sulissusaqarniarnikkut unammilligassat ersarillutik.

Inatsisit tunngavigalugit suliassarivara utoqqaat atugaat pillugit apeqqutitut tunngassuteqartunik, pisortani oqartussanut, pisortat namminersortullu suliffiit kiisalu utoqqaat atugaat pillugit inuiaqatigiinni ilisima-sat annertusarnissaat.


Minnerunngitsumik utoqqaat pillugit paasissutissanik ingerlatitseqqinneq, tamat oqallinneranni utoqqaat sinnerlugit oqaaseqartassallunga kiisalu utoqqaat oqallinnermi peqataanissaannut periarfissaasa pitsaane-rulernissaannik sulissuteqarlungalugu inuiaqatigiit sunniuteqarfigisassallugit.

Utoqqaat inuunerminnik uagutsinnut oqaluttuartut tamaasa annertuumik qujaffigerusuppakka. Tamatuma-ni ilanngullugit qanigisaasut – sulisut politikerit – allallu angalanitsinni oqaloqatigisavut. Naggasiullugu qu-jaffigerusuppara Qeqqata Kommuniani attaveqaatit atorlugit ataatsimiinerit ingerlanneqarsinnaanissaanut suleqatigilluarnitsinnut.

Inussiarnersumik inuulluaqqusillunga




Kiista P. Isaksen



Imai

Siulequt.....	3
Angallannikkut kinguaatoorneq pissutaalluni pilersaarutit allannguuteqarput	5
Utoqqarnik oqaloqateqarneq	6
Utoqqaat pillugit oqaaseqartartoq.....	6
Siunertaq	6
Utoqqaat ilisimasallit;	7
Katersortarfimmi, tamanut ammassumik unnukut innuttaasunut saqqummiineq, ataatsimiisitsineq, tusarniaanerlu;	8
Teamsmøde/Attaveqaatit atorlugit ataatsimiisitsineq – Qeqqata Kommunia, Maniitsoq aamma Sisimiut.....	11
Maniitsumi utoqqaat illuat 42-nik inissaqartitsivoq, qasuersarfissat init marluupput	12
Sisimiuni utoqqaat illuat Qupanuk, paasissutissat;	13
Utoqqaat illuat Qupanuk, Sisimiut	14
Utoqqaat kisimiillutik oqaloqateqarnissamik kissaateqarsimasut saqqummiussaasut itisilinngikkaluarlugit ima qulequtanngorlugit saqqummiunneqarsinnaapput;.....	16
Kattuffik Utoqqaat Nipaas, ataatsimeersuarnerat allanillu aqqissuusanut peqataaneq	19
Kattuffik Utoqqaat Nipaas, ulloq ataatsimeersuarfiusoq;	20
Siulersuisuuninngortussanik qinersineq:	21
Angerlarsimaffimmi ikiorteqartitsineq, Sisimiuni Maniitsumilu	22
Sisimiuni angerlarsimaffimmi ikiorteqartartoq 79-nik ukiulik, kisermaangorsimasoq angerlarsimaffianut pulaarparput	23
Pisinnaatitaaffiit.....	23
Oqaloqatigisagut tamarmik, utoqqaat, qanigisaasut, sulisullu kinassusiisa ilisarineqarsinnaajunnaarsarnerat	24
Utoqqarnik peqataatitsineq:	24
67-it ataallugit ukiullit innarluutillit, kiisalu puiortunngorsimasut utoqqaat illuini najugallit	25
Oqartussaasunut apuusineq, Kommunimit tusaaniarneqarneq	26
Naggasiut;.....	27



Angallannikkut kinguaatoorneq pissutaalluni pilersaarutit allannguuteqarput

Pingasunngornermi 29. maj aallanngittooratta pingasunngorneq, sisamanngorneq tallimanngornerlu ilanngullugit Nuummiit Naalakkersuisoqarfimmiit suliaqut ingerlappagut.

Pilersaarutaagaluartut allannguutissanik nutaanik isumaqatigiisusiornerit.

Najuutinngikkaluarluta Teams atorlugu oqaloqatigisinnaasagut nutaamik isumaqatigiisusiorlugit.

Nuummiinitsinni Teams atorlugu oqaloqatiginninnerit;

Sisimiuni utoqqaat illuanni aqutsisoq, puortunngortut immikkoortortaarfiani tullersorti, angerlarsimaffimmi ikiorteqartitsinermit aqutsisut.

Maniitsumi Utoqqaat illuanni aqutsisoq, angerlarsimaffimmi ikiorteqartitsinermit aqutsisoq.

➡ **TALLIMANNGORNEQ 31. MAJ**

Nal. 17.20 Nuummiit Sisimiunut aallarpugut

➡ **SAPAAT 2. JUNI**

Nal.9.00-12.00 Utoqqaat illuanni najugalinnik oqaloqateqarneq

Nal.13.00-16.00 Utoqqaat illuanni najugalinnut tamanut ilaqutaasunik, sulisunillu oqaloqatiginninnerit.

➡ **ATAASINNGORNEQ, MARLUNNGORNERLU 3. AAMMA 4. JUNI**

Sisimiuni utoqqaat illuanni najugalinnut sulisunullu saqqummiineq.

Teamsikkut Maniitsumi utoqqaat illuanni najugalinnut sulisunullu saqqummiineq.

Oqaluffimmi Utoqqaat Nipaat naalagiaqatigiinnerannut peqataaneq.

Angerlarsimaffimmi ikiorteqartartumut pulaarneq.

Teamsikkut Maniitsumi Sisimiunilu utoqqaat naapinneri, Kommunip ataatsimiitarfianiit.

Katersortarfimmi, tamanut ammassumik unnukkut innuttaasunut saqqummiineq, ataatsimiisitsineq

Utoqqaat ornittagaannut "Inneruulat"-nut pulaarneq, oqaloqateqarneq

➡ **PINGASUNNGORNEQ 5. JUNI**


Utoqqaat Nipaat, Kattuffiup ataatsimeersuarneranut peqataaneq

➡ **SISAMANNGORNEQ 6. JUNI**

Qeqqata Kommuni Borgmesteri Malik Berthelsen, Atugarissaarnermik ataatsimiititaliami ilaasortaq, atorfilittallu oqaloqatiginnissimanitsinnut takusatsinnullu tunngasunik saqqummiussiffiqeqarput. Kii-salu Utoqqaat aamma Utoqqaat pillugit oqaaseqartartup attaveqaatit digitaliusut atorlugit attaveqatigiittarnissamik Qeqqata Kommuni utoqqaat inuuniarnerminni atugaasa pitsaanerulersinnissaat siunertaralugu suleqatigiinnissamik isumaqatigiissuteqarluta.

➡ **TALLIMANNGORNEQ 7. JUNI**

Sisimiuniit ullaakut aallarpugut, Kangerlussuaq Maniitsorlu aqqusaarlugit. Nuummi saperngulluta unueqqaariarluta arfininngornermi 8 juni nal. 9.00 Mittarfiliarpugut, silamillu patsiseqartumik kinguaqataarluta ulloq naallugu mittarfimmeeriarluta unnulersoq apuuffissatsinnut apuulluta.



Utoqqarnik oqaloqateqarneq

Qeqqata Kommuniiani utoqqaat atugaat pitsaanerpaamik nalilersorsinnaajummallugit utoqqaat oqaaseqartuat oqaloqateqarnikkut, pulaarnikkut ataatsimeeqateqarnikkullu ilisimasaannik paasisassarsiorpoq.

Utoqqaat pillugit oqaaseqartartup Qeqqata Kommunianut angalanera sioqqullugu, suleqatigisassat tamar-mik telefonikkut emailikkulluunniit attaveqarfigineqarput. Kingornalu atorfilittat utoqqarnik sullissinermut akisussaaffinni oqartussat sulianillu suliaqartut assigiinngitsut ataatsimeeqatigineqarlutik.

Utoqqaat sinnerlugit oqaaseqartartutut suliassat naammassissagaanni utoqqaat oqaaseqartartuat nunarput tamakkerlugu utoqqaat atugaat aammalumi matumani Qeqqata Kommuniiani utoqqarnut tunngatillugu innuttaasut namminneq misigisaat tusassallugu pingaaruteqarpoq.

Taamaammat angalanitsinni innuttaasut misigisaat pillugit aamma pisariaqartitaminnik sunik ikiorneqarat ikiorserneqarnerallu pillugit innuttaasut sapinngisamik amerlasuut oqaloqatigaagut.

Utoqqaat pillugit oqaaseqartartoq

Inatsimmi tunngavigineqartumi § 8 Utoqqaat illersuisuat piginnaatitaavoq Utoqqaat illersuisuata suliaqarfii-nut pissutsit attuumassuteqartut pillugit killilersorneqarnani oqaaseqarsinnaanermut.

Imm. 2. Utoqqaat illersuisuata pissutsit utoqqarnut ataasiakkaanut tunngassuteqartut pinnagit, pissutsit utoqqarnut nalinginnaasumik tunngassuteqartut kisiisa oqaaseqarfigisinnaavai.

Imm. 3. Utoqqaat illersuisuat taamaallaat oqaaseqaateqarsinnaatitaavoq. Utoqqaat illersuisuat aalajangiis- sinnaatitaanngilaq.

Maluginiaqqussavara oqariartuutigineqartut Qeqqata Kommuniiani Sisimiuni Maniitsumilu utoqqaat illuini najugallit, angerlarsimaffimmi ikiortillit, atorfilittat, ataatsimiisitsinernit allanilluunniit oqaloqateqarnerit atiinik taasaqarfiunngimmata.

Angalaninni paasivara utoqqaat angerlarsimaffiini atugassaritaasut assigiingeqisut. Taammaattumik aamma nalunaarusiami allaaserineqartut ilai imminnut assortuututut misiginarsinnaasassapput, tassunga ilaatigut peqquteqarpoq utoqqaat illuini illoqarfimmiit illoqarfimmut atugassarititaasut periarfissallu assigiingit-sorujussuusinnaaneri.

Siunertaq

Utoqqaat pillugit oqaaseqartartuat naalakkersuinikkut attuumassuteqanngilaq, siunertaraalu utoqqaat inuunerminni atugaasa pitsanngorsarnissaat, utoqqaat inuiaqatigiinni periarfissaasa soqutigisaasalu qulakkeerlugillu siuarsarnissaat kiisalu utoqqaat atugaasa sammineqalernissaat paasisutissiissutigine-qarnissaallu.

Pingaartuuvoq eqqaamassallugu utoqqaat pillugit oqaaseqartartup utoqqaat qanimut tikillugit oqalo-qatiginninnerit, utoqqaat illuini pulaarluni pissutsinik takuninnerit siunertarinngimmassuk aalajangiinis-saq imaluunniit oqartussaasunik nakkutilliinissaq.


Utoqqaat ilisimasallit;

Utoqqaat pillugit oqaaseqartartutut pingaartippara utoqqaat nammineq isummaminnik saqqummiisinnannissaat, taamatullu utoqqaat sumiiffiini naapillugit utoqqaallu pisinnaasaat piumasaallu tusassallugit. Utoqqaat tassaapput namminneq inuunerminnik immikkut ilisimasallit, taammaattumik utoqqaat oqaasiisa eqqarsaataasalu tusarniarnissaat pingaarnerpaauppupput, tassuunakkut utoqqaat takuneqartutut, tusaaniarneqartutut peqataatitaasutullu misigeqqullugit.

Utoqqaat pillugit oqaaseqartartup siunnersuinissamut ilitsersuinissamullu pissussaaffia naapertorlugu, inuit ataasiakkaarlugit oqaloqatiginissaat aammat periarfissiissutigineqarpoq, kiisalu innuttasunut tamanut ammasumik ataatsimiisitsineq aamma ingerlanneqarluni. Tamatuma kinguneraa nalinginnaasumik utoqqaat atugarisaat pillugit paasisaqarneq.

Utoqqaat pillugit oqaaseqartartutut inuit 150-nit ikinnerunngitsut, utoqqaat, qanigisaasut sulisut allallu attuumassuteqarsinnaasut angalanermi matumani naapinneri nuannersumik tupaallaatigaagut. Tamatuma ersersippaa oqaloqateqarnissamik kissaatillit amerlalluinnarnarat.

Utoqqaat immikkut paaqqutarineqartariaqalersimasut illersugaasumik pisinnaatitaaffii eqqumaffigineqartussaaput, utoqqaap ikiorneqarnissamik pisinnaatitaaffia, utoqqaq angerlarsimaffimmi ikiorteqarsimaguni tapersersorteqarluniluunniit imaluunniit angerlarsimaffimmi toqqissisimasumi ikiorserneqarnissaq.




Katersortarfimmi, tamanut ammassumik unnukkut innuttaasunut saqqummiineq, ataatsimiisitsineq, tusarniaanerlu;

Siunertaavoq utoqqaat pillugit oqaaseqartartup akisussaaffii pisussaaffiilu saqqummiunnissaat, utoqqaat periarfissaasa soqutigisaasalu inuiaqatigiinni oqallinnermi oqalliseqataanissaq, utoqqaat peqataanerunissaannik aqqutissiineq, utoqqaat atugaannik periarfissaannillu patajaallisaallunilu suliniutissanik siunner-suuteqarneq.


Inuit 70-nit ikinnerunngitsut peqataapput, oqallinneq uumaarissumik imaqarluartumik pissarsiffiulluurtumilu ingerlavoq, utoqqaat atugaat pillugit inuiaqatigiinni paasititsiniaanissamut paasissutissanik immersuiffiulluurluni. Paasinarluarpoq utoqqaat atugaat periarfissaallu pillugit utoqqarnut siunnersuineq ilitersuinerlu tamakkiisumik amigaatigineqartoq, matumani pisortaqarfinnut, namminersortunut, kattuffinnut peqatigiifinnut il.il. siunnersorneqarnissamut aamma tunngatillugu.

Oqallinnermi eqqartorneqartut qulequtanngorlugit, eqikkarlugit;

- Inuleriffinni sumiluunniit maluginiarnarpoq sulisussaqaarniarneq ajornarsiartuinnartoq, eqqartortariaqalerparput nunanit allaniit tikisitsilluta sulisussat qulakkeerneqarsinnaaneri piffissanngornersoq. Tamatumunga tunngavilersuutigineqartunut aamma ilaavoq sapaatip akunnerata naanerani aammalu akissarsiffinni sulisussaaruttoqartarnera.
- Illuatunganili kulturitsinnik, oqaasitsinnik pingaartitatsinnik naleqartitatsinnillu ilisimasaqanngitsunik sullinneqarnissaq aamma tunuarsimaarfigineqarluni. Ataatsimut isigalugu pingarnerpaatinneqarpoq kiffartuulluarneqarsinnaaneq, pisariaqartitatsinnik matussusiisinnaasunik sulisoqarsinnaanerata qulakkeerneqarnissaa. Eqqaaneqarpoq nunanit allaneersut sullarinnerat maluginiarneqarsimasoq, taammaattumik eqqartorluarneqartariaqartoq.
- Nunatsinni inuleriffinni sulisut sulilluurtut suliaanut naapertuutunik akissaasersorneqartalernissaat, sularlarsutsimut tapit il.il. kattuffiit suleqatigilluarnersigut aqqutissiuunneqartariaqalersut. Taammaattumik utoqqarni sulisut aalajaatsut sulilluurtut akissaatimikkut akitsorneqartariaqarnissaat pissusissamisoortoq.
- Inuleriffinni sulisut pikkorissartinneqartuarnissaat, ineriartortillugillu sulisartumiit ilinniagalittut sulilernissamut aqqutit atorluarnaratigut sulisunik tigumminniinnarsinnaanissamut qulakkeerinnissutaallutillu sullissassanut pitsaasumik kinguneqartarnerat annertusarneqartariaqartoq. Matumani misilittakkat utoqqaat illuanni sulisut ilinniarteqqinneqartarnerisa pitsaasumik kinguneqartarnera assersuutigineqarluni.
- Sulisinnaasut piumaffigineqarsinnaasariaqarput, ajornanngippallaaqimmat pisortanit isumalluuteqarluni ikiorserneqarsinnaaneq.
- Angalaniarnermi billetsit akisungaarmata, sineriassuarpullu isorartoqimmat toqusoqarsimatillugu aammalu ilaqutat tikeraarnissaannut nunatta iluani, nunanullu allanut angalaniarnermi akit utoqqaat akissaqassutsimikkut inorsarfigaat. Pensionisiaqarluni angummanneq ajornartoq. Taammaattumik pissusissamisooraluortoq utoqqaat piartorneranni pisortanit aningaasat illikartinneqartartut amerlineqartariaqarneri.
- Akikinnerusumik angalasinnaalernissaq eqqarsaatigalugu periarfissatut tikkuarneqartoq tassaavoq kiffartuusinnissamut isumaqatigiissutit aqqutigineqarsinnaaneri. Tamatumunga ilanngullugu eqqaaneqarpoq angalatilluni saperngunermi nerissutissanik tunineqartarnermi nerissutissat nalinga kr. 125,- kajuttartoq amigalernikuunera.
- Sulilluarallarnerup nalaani kattuffiit ilaasortaaffisat aqqutigalugit pisinnaatitaaffiit utoqaalernermi annaaneqartarnerat aqqiivigineqartariaqartoq, pisariaqartitsinerpaafitsik nalleraangat ilaasortaaffigisimasatit "annaasimagamikkut" pisinnaatitaaffeerullutik.




- SIK qujanartumik ikiuussinnaafimmini ilaasortaminut sullissilluartarnera eqqartorneqarmat ilanngullugu aamma eqqaaneqarpoq kiffartuuneqarnissamut piffissaq sivisuallaarsinnaasarnera, utaqqinartarmat naparsimasoq orninniagaq inortorlugu toqukkut qimaguttartoq.
- Kattuffiit ilaasortaaffigisat ersarissumik paasititsisarnissaat ujjartorneqarpoq, ilaatigut assersuutigineqarluni SISA – SIK – pension qanoq atugassaanersut, imaluunniit paasisassaanersut.
- Sulisartumiit pensionisiaqalernerme ersarissumik paasitinneqartarnissaq pingaaruteqaqaaq, pisinnaatitaafitsinnik pisussaaffigilersimasinnaasatsinnillu nassuiaalluarneqartarluta.
- Ukioq nutaaq aallartimmat pension iluarsiivigineqartussanngormata isumalluarneq annertusimaqaaq, amerlanerpaanullu tamanna aamma qujanartumik iluaqusiisoq, taammaattorli sulilaaqarsimapput aqqii-vigineqanngitsunik.
- Pensionisiat kisiisa aningaasatigut sutigut tamatigut matussusiisussatut pigalugit Tusass akisuvoq taamatuttaaq internet. Ullutinnilu tamakku pinngitsoorsinnaajunnaaraluttuinnarlutigit.
- Unnersiutigineqarpoq Qeqqata Kommuniani utoqqaat nunanut allanut angalatinneqartarnerat, ataatsimoorluni misigisassarsiornissamut periarfissiisarmat. Illuatungaaniillu aamma maqaasineqarpoq nunatta iluani angalasinnaatitaafeqarnissaq, nunanut allanut sussagattamik apeqqusiillutik.
- Nunatta sineriaa annertoqimmat uggorineqarpoq Qaanaaq tikillugu sinersortaata angalatinneqartannginera.





- KNR nunatta tusagassiisarfia, isiginnaarutikkut tusarnaagassallu utikulunneri qatsunnaqaat. Aallakaati-tassiat isumassaqanngitsut peerniarlik, matumani assersuutigineqarluni "Inuusit show". Paasissutissiine-rit, piviusunik aallaavillit, ullutsinnullu tamanut tulluunerusunik naleqquttut maqaasineqarput. Maqaasineqarput qangaanerusoq aallakaatittakkat isumaqarluartut.
- Najuuttunit tamanit assortorneqanngitsumik isumaqarput puiortunngortut amerliartormata ernumanis-samut pissutissaqartoq tamatumunngattaaq isumaqaqqajaanartartoq utoqqaat sutigut tamatigut ajor-nartorsiortunngorsimasut.
- Najuuttup ataatsip paaserusukkaluarpaa ilisimaneqarnerisooq nunatsinni qassit kaassuartaakkanik atuisuu-nersut?



Teamsmøde/Attaveqaatit atorlugit ataatsimiisitsineq – Qeqqata Kommunia, Maniitsoq aamma Sisimiut

Ataatsimiisitseriaaseq tamanna, ungasikkaluarluni imminut isigaluni ataatsimiisitsisinnaaneq sakkussatsia-laavoq, taammaaliornikkut utoqqaat imminnut isigalutik oqaloqatigiisinnaanerit anguneqartarmat, aam-malu namminneq soqutigisatit tunngavigalugit eqqartueqatigiisinnaalertar-mata.


Ataatsimiisitsinermit matumani Maniitsumiit utoqqaat attuumassuteqartut 26-it kiisalu Sisimiuniit utoqqaat 5-t peqataapput.

Peqataasunit tamani Utoqqaat oqaaseqartartuannut qujassuteqarput, sulilluarnissatsinnillu neriullutik oqa-riartuuteqarlutik.

Qeqqata Kommuniani piffiit assigiinngeqaat;

Utoqqaat illuini najugalinnik qanigisaasunik sulisunillu oqaloqatiginninnerit ingerlappagut, aammalu utoq-qaat ataatsimoortillugit eqqartueqatigalugit.

Maniitsumi utoqqaat illuanni "Neriusaaq"-mi najugaqartut "Teamsmøde" qarasaasiatigut kiinnerluni utoq-qaat pillugit oqaaseqartartup suliassaa pisussaaffii pillugit saqqummiussiffigineqarput, kingornalu uum-maarissumik ammasumillu utoqqaat namminneq atukkatik pillugit saqqummissinissaanut periarfissinneqar-lutik. Tamanna aqutigalugu Maniitsumi utoqqaat aammalumi utoqqaat illuanni najugallit ulluinnarni atu-gaani ilisimasaqarnerulerlungalu eqqartueqatigiinissamut periarfissiivoq.



Maniitsumi utoqqaat illuat 42-nik inissaqartitsivoq, qasuersaarfissat init marluupput.

Eqqartueqatigiinnermi saqqummiunneqartut ilagivaat utoqqaat illuanni sulisut amigartut taamatullu ilin-niasimasut aamma amigaatineqarlutik. Pisariaqartitsinerup nalaani, sulinngitsoortoortoqarneratigut fee-riartoqarneratigulluunniit paarlattaasinnaasunik sulisussanik aamma amigaateqartartut oqaatineqarpoq. Tamatumunnga tunngatillugu najugaqartut eqqaavaat nunanit allaneersunik sulisoqalernissaq ammaffiga-lugu, toqqissisimanartumik sullinneqarnissaq salliullugu pingaartinneqarmat.

Utoqqaat illuani inissat amigartut eqqaaneqarpoq, ilaatigut tarnimikkut napparsimasunik najugaqartoqar-tarmat aamma, tamatumunnga ilanngullugu puigortunngortut inissamik pisariaqartitsisut aamma arlaqar-lutik.

Tarnimikkut napparsimasut arfineq marluk allami ineqartussaagaluit utoqqaat illuanni najugaqartinneqar-tut inissaminiinngitsut, taakkununnga utoqqarnullu ajorluinnartoq, pissutsillu taammaattut akuerineqarsin-naanngitsut.

Ataatsimiinnermi peqataavoq utoqqaat illuanni najugaqartinneqartoq 50-nik ukiulik aanaartoornikoq, ilu-ngersortumik paaseqqulluni nammineq ineqalerusukkaluarluni, utoqqaat akornganni najugaqartinneqarni-ni akueriuminaatitseqisoq.

Sammissasaqartitsineq pingaartinneqartoq, utoqqaat isumaat pingaartinneqarmat peqatigilluinnarlugit im-mersorneqartartoq, sapinngisamillu sammissasat allanngorartinneqartartut.

Utoqqaat nuannaaqalutik unnersiutigaat meeqqat utoqqarnut isumaqaqisumik, ulluinnarnilu inuunermin-nut imalersuutaqisumik utoqqaat angerlarsimaffiannut pulaartartut.

Eqqartueqatigiinnermi nuannersumik eqqartorpaat erinarsoqatigiit tusarnaartitsiartorlutik takkuttartut.

Ukiumut marloriarlutik nuannarineqarluartumik qilanaarineqartuartartumillu utoqqaat illuanni najugaqar-tut sulisullu "fest"-ertarlutik, upernaakkut ukiassakkullu.

Akuttugaluartumik peqatigiiffik aqqutigalugu utoqqaat sapinnginnerit angalaartartut illuaqqamut Kangaa-miunullu.

Nunaliartarlutik, killoqaramillu igaasarlutik tipigialaanguami aasarsiorluartarlutik.

Utoqqarnut susasaqartitsivik ingerlalluartoq ataasinngornermiit tallimannngornermut, namminerlu toqqak-kaminnik suliasaminnik suliaqartarlutik.


Ilanngulluguttaaq oqaluttuaraat timmissanik nerisassaminnik erisaqataatinneqartarlutik, puisinik pilattar-lutik, neqinik uulleqataasarlutik.

Nuanneqisumik unnersiutigaat utoqqaat upernaakkut Neriusaami "Wintergames"-sertarlutik ullut tallimat, tassani Kalaallit pinnguaataat ingerlanneqartarluni

Tamatuma saniatigut Efterskolertut inuusuttut nammineq piumassutsiminnik utoqqarnut nuannaarutaasaqi-sumik aneerissisartut.

Minnerunngitsumillu utoqqaat ilaqtuttaat ulluinnarni akuulluartut peqataalluarlutillu. Kiisalu iluarineqaqisu-mik utoqqaat pisariaqartitsiffianni qanigisaasut, peruluttoqaraangalluunniit unnuisinnaatitaasarlutik.

Utoqqaat amigaatigaat KNR aallakaatitagaat imartuut, matumani assersuutitut taaneqarluni atuffassissutit, oqaluasaartut, meerartatsinnuut, ilanngullugu eqqaavaat inuusuttut isumaqanngitsumik aallakaatitta-gaat utikattut qatsulluinnarlugit.



Sisimiuni utoqqaat illuat Qupanuk, paasissutissat;

Sulisitseriaaseq allaanerusoq misilittagaqarfigilluarneqalersimavoq, aalajangersimasumik ulluunerani, unukkut unnuarsiortartullu aalajangersimasut sulisorineqarput, tamannalu sulisunit iluarineqarluni.

Akunnattoorfimmi arlaatigulluunniit paarlattaasussamik amigaateqarfimmi sulinngiffeqartut allatigulluunniit isumaqatigiissutit malillugit sulisussaannngitsut sianerfigineqarneq ajorsimapput, qasuersaarlutik sulinngiffeqarmata. Intern vikarit atorneqartarput napparsimasoqarpat


Sapaatip akunneranut sulisut akunnerit 36-it sulisarpud. Tamatumalu malitsigisaanik sulisut napparsimallutik sulinngitsoortarnerat annikillissimavaat.

Utoqqaat illuanni iluarineqaqisumik najugartut tamarmik immikkut sulisumik aaliangersimasumik attaveqaatilersorneqarsimapput, taakkuupullu ulluunerani sulisartuusut.

Sulisut ilinniarsimasuunissaat pingaartinneqarpoq, ilinniartitseqqiinerillu ingerlanneqarlutik.

Tamatuma saniatigut puigortunngortut immikkoortortaqaqfianni sulisut paarlaattarnerat "3 hold skift" asut iluarineqarluni pitsaasumik kinguneqarsimavoq, puigortunngortut ilisarsisarsisarnerannut tamanna toqqissisimanermik kinguneqarsimammat.

Nuannersumik maluginiarparput aammalu ingerlateqqitassanut ilaatilluinnarlugu oqaluffimmi naalagiar-toqartillugu toqqaanartumik utoqqaat illuanni tusarnaarlunilu malinnaasoqarsinnaasarnera.



Utoqqaat illuat Qupanuk, Sisimiut

Utoqqaat angerlarsimaffiat "Qupanuk" 1983-imi sananeqarsimavoq kingornalu 2016-mi allineqarluni, ullu-mikkullu najugalinnut 42-nut inissaqarluni ataatsimillu qasuersaartarfeqarluni.

Init paaqqutarisarialinnut, puigortunngortunut aammalu illersukkamik immikkoortumik agguataagaapput.

Utoqqaat illuanni najugallit qulini ikinnerunngitsut oqaloqateqarnissaminnik kissaateqarsimammata tamar-mik oqaloqatigineqarput.

Utoqqaat apuukusutaat ataatsimut isigalugu annerpaamik nerisaqarnermut tunngassuteqarput, pinngit-soortoqaratik tamarmik tamanna annerusumik minnerusumilluunniit eqqartormassuk.

Kisimeeqatigalugit oqaloqatigisagut, ataatsimoorlunilu ataatsimiisitsinitsinni peqataasunit tamanit nerisa-qarnek pillugu allanngortoqarnissaa kissaatigaat. Amigaatigilluinnarpaat kalaallit nerisassaataat kalaali-merngit, ilitsoqqussat.

Ataasarlutik igaffimmi ikiuussimagamik nuannerluinnartumik eqqaamasaqarfigaat, neriutigiuaraluarpaan-gooq taammaattut amerlanerussasut.

Utoqqaat atisaminnik tammaasarnertik assut ajuusaarutigivaat, errorneqareernerisa kingorna tammartarne-ri annertusimammat.

Kalaallit ileqqui, quttasernerit, persuarsiorfinni pagganeeq aamma maqaasisaanut ilaapput.

Utoqqaalluni ulloq takisoorujussuusinnaasarpoq, taammaattumillu aamma KNR Radio tusarnaarneqarluar-tartut ilagaat, maqaasivaat oqaluttuat soqutiginartut, imalimmik aallakaatitassiat, paasissutissiisutillu ersa-rissut. Atuffassissutit, matumani isigiarsulersimanermi tusarnaarsinnaaneq kisiat pigilersimanerani tamanna naleqarluninartut ilagimassuk. Ilanngulluguttaaq eqqaavaat utoqqalilluni tusaasat allanngornerat aamma annertuumik sunniuteqartarnera, taammaattumik aamma KNR TV aqqutigalugu isiginnaagassiat nuanner-sut utikajaangitsut inuunermi imalersuutaasinnaasut maqaasineqarpoq.

Utoqqaat unnersiutigaat sulisut sulilluartut tunniussimasuusullu. Aliikusersuinissamut sammisassaqtitsinis-samullu immersuilluartut.

Utoqqaat nuannersumik eqqartorpaat meeqqat meeqqerivimmiit pulaartartut nuannarineqarluartut, nipi-lersortartut illoqarfimmiit aggerlutik qititsitsisartut utoqqarnut tamanut qiimaallaatasaqisumik, qitaasartar-lutillugooq.

Aammagooq namminneq meeqqanut oqaluttuarterput, qanga pisimasulikkersaarfigalugit.


Maluginiakkatsinnut aamma ilaavoq utoqqaat nuannersumik pilluarpasittumillu kiinaqarlutik oqaluttua-rimassuk silami eqqaaminni uunnaasartarneq, tamanna utoqqarnut isumalerujussuemat naleqartinneqar-torujussuusoq.

Qilanaartuutigisarpaanngooq aamma umiatsiamik angalasarnitik, igaasariartarsimagamik.

Unnersiutaanut aamma ilaavoq illoqarfimmi Taseralimmi Soma-milu caférnissamut aamma periarfissinneqar-tarsimanertik.

Qujamasullutik oqaluttuaraat sammisasaqartitsivimmi suliassanik aallussilluartarlutik. Aammalu igaffeera-qaramik nammineq igasinnaallutik, qanorligooq iganerminni sulisumik ikiuusinnaasumik peqaraluarpat atorluarneqartigissagaluarnepoq.

Naggasiutigalugu qujamasullutik unnersiutigaat pisariaqartitsiffikkut iniminni qanigisaminnik unnuisitsisinaasarnertik, taamatullu ilaqutaasut ataasiakkaarlutik akiliillutik nereqataasinnaasartut, juullimilu akeqanngitsumik nereqataasoqarsinnaasartut.



Utoqqaat kisimiillutik oqaloqateqarnissamik kissaateqarsimasut saqqummiussa at itisilinngikkaluarlugit ima qulequtanngorlugit saqqummiunneqarsinnaapput;

*Unnukkut pulaartunut
sulisut anissiisarnerat
maluginiartarpara, innimisunneq
atulertarlugu.*

*Sulisut nereqataasinnaatitaanginneri
utoqqatsinartarpoq, issiaqatigaluta
nereqataasartuugunik nererusunnermik
kinguneqartassagaluarpog.*

*Utoqqaat illuanni
pisortaatitaasog
maqaasisarparput, ullaakut
alakkaaneq ajorami,
ataatsimoorfitsinnilu
peqataasinnaangittarnera
uggornartarluni.*

*Pisariaqartitsiffinni sianip
nusuttaataa inuleraangakku
annikilliortarpunga, ilaatigut
imerusukkaluarlunga imeq
isigiinarlugu tigusinnaanagulu
assut iluangersunarisarpara.*


*Nammineerlunga
isumagisinnaajunnaarnikuuvunga,
ikiorneqartuartariaqartarlunga,
aamma innaajaartitaasarnera
nuannarinngilara, unnuk unnuarlu
takisaqaaq.*

*Utoqqaat
oqaloqatissaaleqisarpugut,
sulisut ulapittarmata piffissaq
killeqartarpoq.*

Utoqqaat pillugit oqaaseqartartutut suliani aalajangersimasuni malitseqatitsisoqarnissaa pisariaqaraangat sulisunik oqaloqatiginninneq ingerlanneqapallattarpoq, tamannalu pillugu angalareernerup kingorna oqartussaasunut eqqortunut aamma nalunaarusiortarlunga. Nalunaarutiginnittarpunga ilaatigut erumana naluarauteqartussaataitaneralu tunuliaqutaralugit, aammattaarli utoqqaat imminnut tunngatillugu suliat aallartinneqarnissaannut ikiortariaqartutut misigisimasut saaffiginninnerisa malitsigisaanik nalunaaruteqarsinnaasarlunga.

**Sulisunik oqaloqatiginnittariaqalersarneq, apuusisariaqalersarneq, aammalu nalunaarutiginnittariaqaler-
nermut tunngaviit assersuutaasinnaasut ilaatigut makkuuput;**

- Iserfigaara utoqqaq 80-nik ukiulik nammineersinnaanngitsoq siniffimmi nalasoq, niui nukeqanngillat, sanngiitsuullunilu. Sianeq iikkami nivingavoq, utoqqaap 1. meter missaanik sianeq inorpaa siniffiata tunuaniimmat, imigassaa nerriveeqqamiippoq aamma 1. meter missaanik ungasissuseqarmat tigusin-
naanagu, ullaamalli isertoqarnissaminik utaqqisimavoq, suaartartaluarluni nipikikkami tusaaneqarsin-
naasimanani, iserfigaara nal. 10:15.
- Iserfigaara 90-nik ukiulik, rullestolinik qinusaraluarluni tuniumaneqannginnami ilaqtutaminut pulaartar-
mat iluaqtissarimmagit ilaqaataa pitsissimavaa.
Paasissutissanik ersarissunik siammarterisoqartarnissaa kissaatigivaa, tupigusulluni ilisimatippaatigut
aatsaat nammineq tusarlugu peruluttoqaraangat qanigisat tukkutinneqartarsinnaasut, aammalu neriner-
mi akiliuteqarlutik nereqataasarsinnaasut.
- Iserfigaarput utoqqaq 74-nik ukiulik. Nuukkusunnani pinngitsaalineqartutut misigisimalluni utoqqaat il-
luannut nuutsinneqarsimasoq. Utoqqaat illuanni nerisaqartitaanertik naammagittaalliutigaa, nerisas-
sat utoqqarnut tulluanngitsut sasaalliutigineqartarmata, assersuutitut taakkartorpai puulukit, kukku-
kuuaqqat, gullash aammalu millionbøf tassaasut sassaalliutigineqarnerpaasut. Aammagooq aalisakkat
naammaneq ajorput amigartunik igganneqartaramik, ullut ilaanni kissartutugassarisarsimavaat "risen-
grød".
- Iserfigaarput utoqqaq 84-nik ukiulik, nerisatik pillugit qatsussilluinnaqqasoq, assut paasiuminaatitippaa
sooq nerisassat sassaalliutaasinnaasut suusinnaanerinerinik utoqqaat akuutinneqartannginnerat.
- Utoqqaq 84-nik ukiulik, utoqqaat illuanni atuakkanik tigoraaanarnik "Bibliotek"-imik amigaateqartoq,
isigiarsuttuugami atuffanneqartarneq assut pisariaqartikkaa. Oqaluttuupaatigut nammineq TV-mik atui-
suunani isigiarsuttuugumi.
Isumassarsialatsiamik tuniserusulluni siunnersuutigaa utoqqaat illuini pisiniarfeeqqamik pilersitsisoqarsin-
naanera, ullut tamaasa anineq ajoramik aammalu pitsorluttunngornikuunertik tunngavigalugu.
- Iserfigaara utoqqaq 72-nik ukiulik, pensionisiami allagartai tiguneq ajoramigit paasissutissanik ujartuisoq,
paasissutissanik ersarissunik saqqummiisoqartarnissaanik ujartuisoq.
- Iserfigaara utoqqaq 75-nik ukiulik, utoqqaat illuanni najugaqatigisaminit talikkut tillutsissimalluni tilluu-
sersimasoq, annikilliorsimaqisoq, oqaloqateqarnissaminik amigaateqartoq.
- Iserfigaara utoqqaq 79 nik ukiulik Parkinsonimik nappaatilik, ukiut tallimat utoqqaat illuanni najugaqar-
toq.
Iserfigigakku qissaserpoq pulaartoqarnerooq ajorami, aammagooq Sisimiuni ilaqaqannginnami.
Malugaara inaanillunga assut oqalukkusuttoq, silappaarippoq kisiat timaata pissusaani takuneqarsin-
naalluni nappaateqartuusoq, utoqqaap oqaluttuuppaanga puigortunngortutut sullinneqarnini naamma-
ginaguna, misigisarami meeqqatut oqaluffineqartarluni, uffa naleqarluni inuttut perusukkaluarluni.
Misigisimasarsimavoq nakkarsarneqartutut aammalu nammineerluni iisassani nakkutigeqqissaartarsima-
gamigit Ilaanni paasisarlugu iisassani kukkusut.
Oqaluttuupaatigut nerisassat pitsaanngitsut, namminerlu aalajangiisinnaasuuguni kalaaliminertorusun-
nerugaluarluni.
Ilanngullugu oqaluttuupaatigut eqaasaartinneqartartussaalluni, sulisullu piffissaqanngimmata ullormut
taamaallat minutsit pingasut eqaarsaartinneqartarluni, tamannali amigarerujussuarlugu.
Utoqqaap oqaluttuupaatigut assiutini pingaartitani pisussinnaannginnami ukiut qassinngulersuni sulii i-
gaannut nivinngarneqanngitsut, toqqoqqasut nuisinneqarsinnaagaluarlutik, nammineq inigiga-
miuk tamanna pingaartikkaluarlugu.
Utoqqaq isertoqarluni assut qujaniarpoq, neriuutigalugulu oqaatsini kinguneqarumaartut.



Utoqqaat ataqqillugit piffissaqarfigalugit nuannersumik qungujunngitsoorfiusunik aamma misigisagut ilaqartarput, oqaluttuannguaq una angalanitsinni nalaatarput nuannersunngorlugu oqaluttuarilaarniarparput;


Angalaqatima (AR) iserfigaa utoqqaq puigortunngorsimasoq, demenseqartoq. (AJ iserami tamanna ilisimasimangila) Utoqqaap AR tasissiullugu iniminut isertissimavaa, igalaakkullu isikkivik takoqqullugu.

Utoqqannguup aappalaartoq AR-mut takoqqusimavaa, AR-lli aappalaartoq sumiorpaluutaasoq paasinnginamiuk utoqqarmut akisimalluni; Haapalaaq? AR eqqarsapallassimavoq immaqa una utoqqaq Narsarmioq?

Malitsiinarlugu utoqqaq unnersiorsimavoq nalliulluni, AR-llu malitsiinarlugu pilluaqqoriarlugu aperisimalugu; nalliuppit iniivisseerpit ? akiani utoqqaq akisimavoq Ha..suna? Taamaasillunilu AJ paseriasaarsimallugu utoqqaq puujortuusimassasoq, demensertuusimassasoq.

Oqaluttuaq inequnartoq, sumiorpaluutit paatsooqatigiinerillu qanoq aamma misigisassaasarnersut piviusu-meersumik oqaluttuannguaq ilanngutilaarparput.

Imalu naggaserneqarluni; iserfigisara aamma oqarfigigakku atisatit kusanat tulluarivatit, taammaalilluni utoqqaq nalliutileriasaarpoq aappalaartoq igalaakkut takoriammiuk. Marlukasiulluta illaqaagut.



Kattuffik Utoqqaat Nipaat, ataatsimeersuarnerat allanillu aqqissuusanut peqataaneq

3. juni 2024 ataasinngorneq, peqataasussasut tikerarput, najugaqarfissaminnilu Knud Rasmussen Højskolianut inissitserlutik. Ilasseqatigiinnerit ingerlanneqarput.

4. juni 2024 marlunngorneq, nal. 09:00 naalagiaqatigiittoqarpoq. Siarngup naammassinerani kasuttarne-rit qulingiluaat pereermata Katinngatilisartut siulersuisullu iseqatigiipput.

4. juni 2024 marlunngorneq, Knud Rasmussenip Højskoliani Nal. 10:00 - 12:00, Utoqqaat pillugit periusis-siaq pillugu Naalakkersuisoqarfimminngaaniit saqqummiussusiqarpoq.

Kiisalu ualikkut nal. 13:00 – 15:00, Utoqqaat pillugit inatsissiaq Naalakkersuisoqarfimmiit aamma saqqummiunneqarluni.

5. juni 2024, ataatsimeersuarnerup ullua

Nal. 09:00 Katinngat siaarneqarpoq

1.minut Nipaallisimaqatigiineq, utoqqaat qimagussimasut eqqaanarlugit.

Ammaaneq, tikilluaqqusineq

Kasper Larsen, Kattuffiup siulittaasua ammaalluni oqaaseqarpoq.

Malik Berthelsen, Qeqqata Kommuniani Borgmesteri tikilluaqqusilluni oqaaseqarpoq

Erik Jensen, Naalakkersuisut sinnerlugit oqaaseqartuuvoq.

Kiista P. Isaksen, Utoqqaat pillugit oqaaseqartartoq

Ataatsimeersuarnerup ingerlanneqarnerani makku tikinneqarput;

Aqutsisussamik toqqaaneq

Taasisinnaasut kisinneqarnerat

Oqaluuserisassat akuersissutigineqarnerat

Erinarsoqatigiineq

Siulersuisuunerit nalunaarutaat

Naatsorsuutit saqqummiunneqarnerat

Ulloqqeqqasiorneq

Akiliutip angissusaata aaliangiuffigineqarnera

Siunnersuutit oqaluuserineqarnerat

Ataatsimiinneq tulleg sumi ingerlanneqarnissaanik, siulersuisuunerit aaliangigassaat.

Siulersuisunngortussanik qinersineq

Siulittaasoq, Aaingaaserisoq, allatsi, siulersuisooqataasussanik 3-nik qinersineq • taajuuinermi tulluuttut 3-sut sinniisussanngorneri

Kiisalu Kukkunersuisussamik qinersineq

6. juni 2024, sisamanngorneq, Knud Rasmussenip Højskolia Siulersuisunngortut ulluat


➔ Ataatsimeersuarnermi aaliangiunneqarsimasut pillugit eqqartuinerit

➔ Suliassat agguataarneqarneri

➔ Akisussaaffilersorneq

Siulersuisunngortut periarfissaqarput utoqqaat ataatsimeersuariartut, ataatsimeersuarnermi anguniagassa-tut aaliangiunneqartut, siunnerfiillu pillugit suliakkiuteqarnissaminut.

7. juni 2024, tallimanngorneq nal. 10:00 Kalaallisuuliornermik ilinniarfimmuut pulaarneq.



Kattuffik Utoqqaat Nipaat, ulloq ataatsimeersuarfiusoq;

Ataatsimeersuarneq sineriatinni illoqarfiit amerlanersaasa peqataafigisaanik, Kangaatsiaq, Tasiilaq Ittoq-qortoormiulluu kisiisa minillugit ullunik marlunnik utoqqarnik 26-it missaaniittunit ingerlanneqarpoq.

Ataatsimeersuarneq nuannersumik imaqarluartumik ingerlanneqarpoq, nunatta sineriaani piffinni assigiinngitsuni utoqqaat atugaat nuannersut, unammillernartullu ataatsimoorluni iliuuseqarfiginiarneqartariaqartut, aammali piffinni assigiinngitsuni peqatigiiffitsik aqqtigalugit iliuuseqarfigineqarsinnaasut eqqartorneqarlutik.

Kattuffik Utoqqaat Nipaat, isumalerujussuaq, katersuuffik, nukittuumik ingerlanneqarnissaata pingaaruteqassusia ilanngullugu eqqartorneqarpoq, tamatumani aningaasaqarniarnikkut unammilligassat aamma eqqartorneqarlutik. Aningaasannanniartarneq ilungersunartoq, aningaasaateqarfinnut qinnuteqaatit itigartinneqartartut, uteriisaarneq, oqaloqatiginninnerit, nikallujaasuseqarnissarlu siulersuisuni sulinermi pingaaruteqaqisoq. Qujanartumilli Namminersorlutik oqartussat kiisalu Tips & Lottomiit aningaasaliisoqarneratigut ataatsimeersuarneq ingerlanneqarsinnaasimasoq.

Siulersuisuni sulineq imaannaangitsuumat, atortorissaarutit "teknologi" ineriartoqimmat pikkorissartarnissaq pisariaqartarmat periarfissat misissorneqartariaqartut ilanngullugit eqqartorneqarpoq, tamatumunnga suleqataajumallunga neqerooruteqarpunga, tamannalu tigulluarneqarluni.

Pisortat oqartussaaffiit, inatsimmik tunngaveqarluni kiffartuussiviit soorlu Kommunit pisussaaffii tunngavigalugit utoqqarnut atugassarititat inatsisitigut illersukkat ilaatigut tamakkiisumik naammassineqarsinnaaneq ajortut unammillernartartut tupinnanngitsumik itisuumik eqqartorneqarput. Matumani qulequttat makku tikinneqarlutik;

Pension sulii tamakkiisumik piffiit ilaanni inunnullu ataasiakkaanut aqqivigineqanngitsut.

Kommunimiit Kommunimut akileraarutip assigiinnginneri tunngaviullutik tigusartakkat assigiinngitsut, taammaalilluni utoqqaat aamma assigiinngitsunik tigusartagaqarlutik. Pensionisiallit akileraartarunnaartariaqaraluartut.


Sineriak tamakkerlugu sutigut tamatigut akit qaffasippallaarneri utoqqaalluni ilungersunaqisut.

Nunaqarfinni atukkat artornartut, unammillernartorpassuit. Ilaatigullu eqqartorneqartut makkuusut qulequtanngorlugit saqqummiutilaarneqarsinnaaput;

- Sineriatinni angalaniartarneq ilungersunartoq,
- Angalaneq akisuallaartoq
- Avanersuarmi utoqqaat angerlarsimaffiat peruluttunut peqqinnissaqarfiup atortarmagu tulluutinnigikkaluartoq, peqqinnissaqarfik unnukkat matugaangat utoqqarmiut atorneqartartoq, innimisunnermillu tamanna najugaqartunut ilaqutaasunullu kinguneqartartoq.
- Kommunit sipaarniarnerujussui malunnarsigaluttuinnartut,
- Kissaatiginaraluartoq qinikkat sutigut tamatigut sulinerunissaat,
- Avinngarusimasuniilluni Kommunit qinikkallu siunertaat anguniagaallu apuunneq ajortut
- Angerlarsimaffimmi ikiorteqartarneq eqqarsaatigalugu sulisut ikippallaartut, angerlarsimaffimmi ikior-teqartitsisarneq nukittorsartariaqarpoq, atugassarititaasut piffimmiit piffimmut assigiinngitsorujussuusut aqqivigineqartariaqartut.

Siulersuisunngortut suliasat tiguaat, oqaluuserisassaniingitsulli eqqartorneqartut siulersuisunngortussanut suliakkiutigineqarlutik.

Kattuffiup ataatsimeersuartarnera ukiuni marlukkaarlugit ingerlanneqartalernissaanik siunnersuutitut ilaammat eqqartorluariarlugu taasisoqarneratigut ukiut pingasukkaarlugit ingerlanneqartarnissaa amerlanerussuteqarluartut aaliangiuppaat.



Kattuffimmut ilaasortaanermi ukiumut akiliutaasarteq ilanngulluguttaaq taasissutigineqarpoq, ukiumut illoqarfimmut kr. 4.000,00 amerlanerussuteqartut aalajangiuppaat nunaqarfimmullu kr. 1.500,00 aamma amerlanerussuteqartunit akuerineqarluni.

Tulliani ataatsimeersuarnissaq sumiiffissa aalajangiunneqanngilaq siulersuisuuninngortut misissuereerpata sumiiffissaq aalajangiunneqarumaarteq ataatsimeersuutunit tamanit akuersissutigineqarpoq.

Siulersuisuuninngortussanik qinersineq:

Siulittaasutut qinersineq;

Siulittaasussamut qinigassanngortippoq Jens Johansen Sisimiut, allamillu qinigassanngortittoqanngimmat pattaaneqarpoq siulittaasunngorlunilu.

Aningaaserisutut;

Qinigassanngortillutik sassartut marluupput, taasineri Nivi Brandt Sisimiut, amerlanerussuteqartunit qinerneqarluni aningaaserisutut ingerlaqqippoq.

Allatsitut qinersineq;


Qinigassanngortillutik sassartut marluupput, taasineri H. Jørgen Berthelsen amerlanerussuteqarluni allatsinngorluni.

Siulersuisuunernut ilaasortanngorusullutik sassartut arlaqarput; taakkunani Peter Andreassen Qasigiannguit, Kasper Larsen Ilulissaat, kiisalu Karl Hansen Qasigiannguaniit ilaasortanngorlutik.

Sinniisussatut qinigaasut tassaalerlutik;

Ovesine Hansen Aasiaat, Peter Petersen Paamiut, kiisalu Åge Jakobsen Nanortalik.

Sinniisussatut inissisimasut arlaat tunuarpat sinniisutut inississaq Arnaliit Simonsen Qaqortoq.



Angerlarsimaffimmi ikiorteqartitsineq, Sisimiuni Maniitsumilu

Angalanermi matumani innuttaasut, utoqqaat qanigisaasullu tikillugit oqaloqatiginnginnerini pisortat uluinnarnilu aqutsisut ataatsimeeqatigineqarput, matumani aamma periarfissinneqarlutik saqqummiussinisaminnut, paasissutissanillu tunioraanissaminnut.

Paasisagut ataatsimut isigalugit nalunaarusiami uani ima nalunaarsorusuppagut;

Sisimiuni angerlarsimaffimmi ikiorteqartitsineq ingerlalluarpoq, Maniitsumili allaanerulluni. Maniitsumi sulisusaqarniarnikkut unammillernartumik inissisimasoqartartoq aamma ilisimalerparput, sulisullu sulilluartut pitsaasut sullissilluartullu pigineqarlutik.

Ilisimalerparput Sisimiuni Maniitsumilu utoqqaat pisariaqartitaat naappertorlugit sullissisoqartartoq, saagut oqurutillu puui ikiortit taarsorsorinnaasarpaat, kiisalu pisariaqaleraanngat aamma igalaat asanneqarsinnaasarlutik.

Sulisut tigummiinarniarlugit suliffigissaanermik pisortat ingerlataqarput, napparsimalluni sulinngitsoortarnerit annikillisarlugit, tamannalu aqutsilluarnikkut iluatsiffiusimavoq. Sulisunik sulilluartunik nersualarinneq pingaarutilittut ingerlanneqarpoq.

Sisimiuni utoqqarnik pisariaqartitsisunik nakkutilliisinnaaneq periarfissaavoq, unnukkut nal. 22.30 tikillugu, pisariaqartitsivittoqartillugulu ulloq unnuarlu aamma periarfissiissutaasarsinnaalluni.

Angerlarsimaffimmi ikiorteqartitsinermi pisortat aqutsisullu pikkorissarsimasuunissaat anguniartarpaat, kiisalu aqutsisut pisortatut ilinniarsimasuunissaat anguniarneqartuarterluni.

Maniitsumiit erseqqissaatigineqarpoq sullitaq qitiutillugu ilaqututaasullu suleqatigilluarlugit killiffissiuineq ingerlanneqartartoq, tamannalu qaammatit ataatsip imaluunniit marluk akornganni ilaqutaasut peqatigalugit ingerlanneqartarluni.

Utoqqaat piginnaasaat ataqqineqartartut, utoqqaat nammineersinnaanerat killeqarluinnaleraangat sapinngisamik aatsaat utoqqaat illuannut nuuttartut.

Ataatsimut isigalugu Peqqinnissaqarfik suleqatigilluarneqarpoq, matumani Kommuni peqatigalugu sullitaq qitiusoq pingaarnerpaatinneqartarluni. Pingaartinneqarportaaq pisariaqalersillugu ilaqqat pisinnaagaangata aamma ikiuusinnaasarnerat.

Sisimiuni angerlarsimaffimmi ikiorteqartartoq 79-nik ukiulik, kisermaangorsimasooq angerlarsimaffianut pulaarparput

Angalanitsinni angerlarsimaffimmi ikiorteqartartumik pulaarusulluta qujanartumik iluatsitsivugut, illu iserfigisarpur iseruminarpoq nuannerlunilu. Iserfitta unnersiorfigaatigut ikiortit pitsaasuusut tatiginartut suliluartut, pissusigissaarlutillu ataqqinnittuusut. 79-nik ukiulik pulaagarput isumaqarpoq sapaatip akunneranut tiimit ikippallaartut, kiserliornarsinnaasartoq, aamma ullut ilaanni oqaloqateqarneq ajorami, ikiortini iseraangat ilaanni suliasat tunulluatsillugit oqaloqatigerusaarusunnerusarlugu.

79-nik ukiulik rollatornik atuisuuvooq, illoqarfimmullu nikissagaangami taxatariaqartarluni, angerlarsimaffimmi ikiortini ilagalugu niuerniartarluni.

Angerlarsimaffimmi ikiortasut illup iluani uffarfimmi igaffimmilu asaasarpur, kiisalu oqorutit puui saagullu taarsersortarlugit, aamma pisariaqaleraangat ikiortit igalaat asassinnaasarpaat.

Ilaquttaminik tikeraarteqartilluni angerlarsimaffimmi ikiorteqartitsivimmi aqutsisunut nalunaaruteqartarpoq, nammineerlunilu aaliangersinnaatitaallugu ikiorteqanngikkallassanerluni, ikiortilli suliasat suliarinia-raagamikkut tikeraat aporfigneq ajoraat.

Siusinnerusukkut ulluunerani sammisassaqtitsivimmi "Dagcenter"-imi atuisuusarsimavoq, maannakkulli orniguppiassaarsimalluni, kissaatiginerugaluarpaa taanna utoqqaat illuaniinani allamiisasooq, namminerooq utoqqaqatiminik nalligusoqqajaasarami, aammagooq ikinngutit qanigisat pisinnaajunnaarnikut akornganniineq nammineq saperamiuk.

79-nik ukiulik assasortarami ornittakkamik amigaateqarnerarpoq, annermik oqaloqateqarnissamik inussilaarnissamillu amigaateqartarami.

Pisinnaatitaaffiit

Angerlarsimaffimmi ikiorteqartitsisarneq pillugu Namminersornerullutik Oqartussat nalunaarutaat, Pisortanit ikiorsiissutit pillugit Inatsisartut peqqussutaanni nr. 10-mi 10. november 1982-imersumi § 20, imm. 3 tunngavigalugu aalajangersarneqarput:

§ 1. Angerlarsimaffimmi ikiorteqartitsineq inooqatigiinnikkut peqqissutsikkulluunniit atukkat tunngavigalugit aallartinneqarsinnaavoq, sulisut uku innersuussuteqareernerisigut:

- a) Peqqinnissaqarfimmi sulisut
- b) isumaginninnermi oqartussani sulisut.


Imm. 2. Angerlarsimaffimmi ikiorteqartitaanissaq inunnit ilaqutariinnilluunniit tamatuminga pisariaqartitsillutik misigisimasunit aamma qinnuteqaatigineqarsinnaavoq.

Angerlarsimaffimmi ikiorteqarneq

Nammineq inuttut angerlarsimaffigisami pisariaqartitat najoqqutaralugit qanoq ukioqarnerit apeqqutaatinnagu ikiorteqarneruvoq paaqqutarinninnerullunilu. Assersuutigalugu uffarnissamut aamma eqqiluisaarnissamut kiisalu allatigut eqqiaanermut, pisiniarnermut atisanillu errorsinnermut ikiuinerusinnaavoq.

Angerlarsimaffimmi ikiorteqarnermi siunertavooq:

- Illit sapinngisamik sivilunerpaamik nammineq sungiusimasat atugaralugit angerlarsimaffinniissinnaanissat.
- Nammineq angerlarsimaffinni toqqissisimanisavit qulakkeernissaa.
- Najukkanni avatangiiseqarsinnaanissat najukkannilu attavigisatit aamma ilaquttatit ikinngutitillu attavigiarsinnaallugit.



Oqaloqatigisagut tamarmik, utoqqaat, qanigisaasut, sulisullu kinassusiisa ilisarineqarsinnaajunnaarsarnerat

Nipangiussisussaataaneq, utoqqaat, qanigisaasut piffinnilu inuit oqaloqatigineqartut illersugaanissaat pisutigalugu nalunaarusiami atinik taasaqanngilagut.

Utoqqaat pillugit oqaaseqartartutut sulinermi politikkerivarput inuit kikkuunerisa ilisarineqarsinnaajunnaarsartarnissaat. Suliani aalajangersimasuni malitseqatitsisoqarnissaa pisariaqaraangat, suliat taakku oqartussaasunut eqqortunut ingerlateqqinneqartarput.

Utoqqaat, qanigisaasut innuttaasullu saaffiginninneri, utoqqaat pillugit oqaaseqartartumit tusaaneqarumallutik imaluunniit siunnersorneqarumallutik saaffiginninneri kinaaneq oqaatiginngikkaluarlugu pisinnaaneri pingaaruteqarlunnarpoq. Matumani pingaarnerpaajulluni utoqqaat qanoq innerannik, oqariartuutigerusutaanillu tusarnaarnissaq.

Saaffiginnittoqartillugu imaqarniliortoqarneq ajorpoq, kisiannili pingaarutilinnik malugisaqarnermi allatuisoqartarpoq. Oqaloqatigiinnerup kinaaneq oqaatiginngikkaluarlugu ingerlassinnaanerata tunngavigaa, utoqqaat ataasiakkaat toqqissisimanissaat.

Utoqqarnik peqataatitsineq:

Utoqqaat oqaloqatigineqassatillugit pingaartuuvoq utoqqaat ataqqillugit naleqartillugillu pisinnaatitaaffiisa tunngaviinik aallaaveqarnissaq. Utoqqaat peqataanissaminut aqquutissiuunneqartariaqarput, taakkuuppummi pisinnaatitaaffinnik pigisaqartut. Peqataatitsinikkut qularnaarneqassaaq utoqqarnut ataqqinnittumik, utoqqaat inuunerisa killiffianni pisariaqartilersimasaanillu suussusilersuinissaq aammalu aqqiisutissat malitseqatitsinissallu oqaasertalernissaannut periarfissiineq.


Utoqqaat nammineq inissisimanertik inuunerminnilu atugarisatik pillugit annertuumik ilisimasaqarput, utoqqaallu aperinerisigut qanoq ingerlanerat pillugu toqqaannartumik paasisaqartarpugut, tassuunakkullu utoqqaat aqqiisutissatut siunnersuutaat pissarsiarisinnaavagut.

Pingaartullit ilagaat ilaqutaasut qanigisaasullu, taakkuummata utoqqaat atugaanik ilisimaarinnittut. Aammattaaq pingaaruteqarpoq oqartussaasut, taakkuuppummi utoqqaat ikiortariaqalersimasunut iliuuseqarnissamullu akisussaasuusut.

Eqqaamassavarput utoqqaat misigissutsitik nuannersut nuanninngitsullu pillugit oqaatsit atorsinnaasaat annertummata, assigiingissinnaaqalutillu. Aamma utoqqaat isiginneriaasiinik isumaannillu aperineq tassaamat ataqqinnermik takutitsineq.

Ilaqutaasut, qanigisaasullu naapisinneqartarnerisigut ataqatigiisumik ilungersorluta utoqqaat peqataatillugit utoqqaat killiffianni inuuneq nukittorsartariaqarippat qularnanngilaq.

Utoqqaat angerlarsimaffiini, pisinnaanerusullu angerlarsimaffiini najugaqartut aqqiissuulluakkamik pulartartoqarsinnaaneq ujartugaanuttaa ilaavoq, taammaattumik kaammattuutigissavara nalunaarusiami uani taakkartorneqartut piviusunngortinneqarsinnaasut arlaqartut pillugit iliuuseqartoqarnissaa.



67-it ataallugit ukiullit innarluutillit, kiisalu puiortunngorsimasut utoqqaat illuini najugallit

2024, August ingerlanerani nunatsinni utoqqaat illui toqqaanartumik oqarasuaatitigut attavigalugit kiisalu mail atorlugu utoqqaat illuini 67-it ataallugit ukiullit innarluutillit qaassit najugaqartinneqarnersut aam-malu puiortunngortut najugaqartut qassiunersut paasiniaaviginerini paasissutissat pissarsiagut, ajoraluartu-mik piffiit ilai akissuteqanngimmata kisitsisit pissarsigagut uani kisimi ersipput;

Paasissutissaq

67-it ataallugit ukiullit innarluutillit, kiisalu puiortunngorsimasut utoqqaat illuini najugallit

Avannaata Kommunia, katillugit: 9

Puiortunngortut katillugit: 16

Ajoraluartumik Ilulissat aamma Qaannaaq kisitsisinngorlugit pissarsianngilagut

Qeqertalik Kommuni, katillugit: 2

Puiortunngortut katillugit: 10

Ajoraluartumik Qasigiannugit aamma Aasiaat kisitsisinngorlugit pissarsiarinngilagut

Qeqqata Kommunia, katillugit: 4

Puiortunngortut katillugit: 31

Kommuneqarfik Sermersooq, katillugit: 4

Puiortunngortut katillugit: 19

Nuumminngaaniit, Nuussuarminngaaniillu ajoraluartumik kisitsisit pissarsiarinngilagut

Kommuni Kujalleq, katillugit: 6

Puiortunngortut katillugit: 26

67 ataallugit ukiullit innarluutillit utoqqaat illuini najugallit katillugit: 25

Puiortunngorsimasimasut utoqqaat illuini najugallit katillugit: 102


Paasissutissaq

Utoqqarnik paaqqinniffiit il.il. pillugit Inatsisartut peqqussutaat, nr. 580-imi 29. november 1978-imeersu-mi § 2 tunngavigalugu makku aalajangersarneqarput:

Utoqqarnik paaqqinniffinnut il.il. nuunnissami piumassaqaataasut nalinginnaasut

§ 1. Pensionisiallit namminneq angerlarsimaffiminniiginnarsinnaanngitsut kommunimi utoqqarnik paaqqinniffimmut nuunniarlutik qinnuteqarsinnaapput.

Stk. 2. Pensionisiallit paaqqutarineqarnissamik sullinneqarnissamillu kommunip utoqqarnik paaqqinnif-fiani naammassineqarsinnaanngitsunik pisariaqartitsisut peqqinnissaqarfiup ataani paaqqinniffimmut nuukkumallutik qinnuteqarsinnaapput.



Oqartussaasunut apuusineq, Kommunimit tusaaniarneqarneq

Utoqqaat pillugit oqaaseqartartutut angalanermi pilersaarutit tamakkermata, naggataarutaasumik.

Qeqqata Kommuniani politikkikkut aqutsisunut atorfilittanullu paasisat nukingernartutut nalilerneqarsinnaasut, uparuartariaqartut kiisalu nersualaarinnissutaasinnaasut apuunneqarput.

Taamaaliorpugut utoqqaat saqqummiussaasut, kiisalu sutigut tamatigut ilisimalikkatsinnut suliat aallartinneqarnissaannut ikiortariaqartutut misigisimasut saaffiginninnerisa kingorna.

Nalunaarutitsinnut ilaavoq pisoq utaqqissuneqarsinnaanngitsoq, angalanitta nalaani utoqqaat angerlarsimaffianni naammattuugara. Tamanna nukingermat oqaasitigut nalunaarutiginninneq piaartumik ingerlapara, kingornalu neriorsuina malillugu pappiaranngorlugu aamma Qeqqata Kommunianut nassiussillunga.

Paasissutissaq

Inuit innarluutillit tapersersorneqarnissaannut Inatsisartut inatsisaat, nr. 13, 12. Juuni 2019

Kapitali 5

Nalunaarutiginnittarneq

Nalunaarutiginnittussaataaneq nalinginnaasooq

§ 32. Inuup innarluutillip atugarissaarneranut, peqqissusaanut imaluunniit ineriartorneranut navianartorsiortitsisumik atugaqartinneqartoq innuttaasup paasiguniuk, innuttaasup kialluunniit kommunalbestyrelsimut nalunaaruteqarnissani pisussaaffigaa.

Imm. 2. Kommunalbestyrelsip nalunaarutiginninnerup tigunerata kingorna sapaatip akunnerata ataasip qaangiutinnginnerani, nalunaarutiginninneq tiguneqartoq innuttaasumut allaganngorlugu uppernarsaalluni nassiutissavaa.

Sakkortusisamik nalunaarutiginnittussaataaneq


§ 33. Isumaginnittoqarfinni, peqqinnissaqarfinni ilinniartoqarfinnilu sulisut, inuk innarluutillik tapersiivigineqarnissamik pisariaqartitsisoq, inuussutissarsiutigalugu sulinerminnut atatillugu sulisup paasiguniuk imaluunniit ilimaginissaanut pissutissaqaruni, ingerlaannaq kommunalbestyrelsimut nalunaaruteqarnissamik sukannernerusumik pisussaaffeqarput. Nalunaarutiginnittussaataaneq taanna, innuttaasunit tamani qinerneqarlutik suliaqartunut imaluunniit inuiaqatigiinni sullissillutik suliaqartunut, atuuppoq.

Imm. 2. Nalunaarutiginninnerup tigunerata kingorna sapaatip akunnera ataaseq qaangiutsinnagu sulisumut nalunaarutiginnittumut, nalunaarutiginninneq tiguneqartoq allaganngorlugu uppernarsarlugu kommunalbestyrelsip nassiutissavaa.

Utoqqaat qangatuulli aalassaritsigiunnaarlutillu suliuunnaarnikuupput, assigiinngitsunik sanngiilliuuteqalersarmata ikiorneqartariaqalersarlutik.

Kisitsisit takutereerpaat utoqqaat paaqqutarineqarnissamik pisariaqartitsisut kiisalu puigortunngortut ulloq unnuarlu nakkutigineqartariaqalersimasut utaqqisut amerliartortut, sulisussallu amigaatigineqartut. Pisariaqartitsineq naappertorlugu iliuuseqarnissaq utaqqissuneqarsinnaanngilaq.

Qeqqata Kommuniani piffiit ilaanni sulisussaqaarniarnerup, sulisussaaruuttarnerlu qanoq iliorluni qaangerneqarsinnaanera qulakkeerneqarnissaanut Qeqqata Kommunian aqqiissutissanut piumassuseqarnera maluginiarparput.



Naggasiut;

Nunatsinni utoqqaat amerliartorput, taamaattumik pingaaruteqarluinnarpoq utoqqaanerusunut peqqissut-simik siuarsaanissaq, taamaattumik pingaaruteqarluinnarpoq iliuuseqartussani assigiinngitsuni pisariaqarti-tat, kissaatit periarfissallu aallaavigineqarnissaat. Inerisaanernullu atatillugu iliuuserisanut utoqqarnik, suli-sunik qanigisaasunillu sammisassanut peqataatitsisoqartariaqarluni.

Utoqqaat inuaqatigiinnut nukiupput annertuut kulturimullu tunngatillugu piginnaasaasa ilisimasaasalu an-nertuut ulluinnarni atornissaat pikkoriffiginerujussuusariaqarparput.

Unammilligassanut isumatuumik aallaaveqarnissaq inuaqatigiinni pisariaqarpoq. Ullumikkut suliffeqarner-mi kikkut tamaasa atorfissaqartippagut aamma suli amerlanerusut pisariaqartillugit.

Kommunit akisussaaffigaat qulakkiisallugu utoqqarnut paarisarialinnullu inissaateqassalluni, innarluutilin-nut najoruminartunik inissiaqassasoq, minnerunngitsumillu sulisoqarnissaq.

Ilinniartitaanerup qaffasissusaanik pitsaanerulersitsineq siunissami sulisussanut piumasaqaateqarnissaq naammassisariaqarparput.

Ullumikkut siunissamilu suliffeqarnerup assaat piginnaasallit pikkorissut pisariaqartippagut. Sulisussat nukit-torsarnerannik suliaqarneq inuaqatigiinni suliassaavoq pingaaruteqangaartoq.

Inuleriffinni sumiluunniit maluginiarnarpoq sulisussaqaarniarneq ajornarsiartuinnartoq, utoqqaat piareersi-mapput eqqartussallugu nunanit allaniit tikisitsilluta sulisussat qulakkeerneqarsinnaaneri.

Ataatsimut isigalugu pingaarnerpaatinneqarpoq kiffartuulluarneqarsinnaaneq, pisariaqartitaminnik matus-susiisinnaasunik sulisoqarsinnaanerata qulakkeerneqarnissaa.

Nerisaqarnermut tunngatillugu kalaalimerngit utoqqaat kinaassusaannut inuunerisalu naleqassusaannut pingaaruteqarluinnartoq oqaatigineqartariaqarpoq, Kalaallit inuit nerisaanik sutigut tamatigut amigarsineq pinngitsoortoqanngitsumik oqariartuutigineqarmat.

Angalanermi matumani inuit 150-nit ikinnerunngitsut peqataanerat takussutissiivoq utoqqarnut tunngas-suteqartumik oqallinnermik, pisariaqartitanullu piviusunngortitsinissamut peqataarusuttoqarlunilu pisaria-qartitsisoqartoq, matumani mininneqanngillat pisortaqarfinnut, namminersortunut, kattuffinnut peqatigiif-finnut il.il. siunnersorneqarnissamut aamma tunngatillugu.

Utoqqaat ujartorpaat pisinnaatitaaffinnut qaammarsaaneq annerusoq, ikiorneqarnissamut periarfissat ta-matigut ilisimaneqarneq ajormata. Kissaatigineqarpoq pisortat, Kommunit ersarissunik takujuminartunik paasinartunillu paasissutissiisoqartarnissaa. Matumani pisortanut saaffiginnilluni qinnuteqartoqarsinnaasar-mat periarfissat suunersut ilanngullugit.

Ineqarnermut tapiissuteqarsinnaanermut tunngatillugu namminerisamik illuminni najugalinnut, pisortat pi-gisaani najugalinnullu pisinnaatitaaffiit assigiinngitsorujussuuneri aaqqiivigineqarnissaat ujartorneqarpoq. Taamaaliornikkut utoqqaat atukkamikkut ulluinnarni inuunerannut oqilisaataasinnaasut aqqutissiuunneqar-nissaat pingaarnerpaatut tunngavigineqarluni.

Utoqqaat inigisaminnut akiliutigisartagaat assigiinngitsorujussuusinnaasarmata aningaasat ulluinnarni pisa-riaqartitanut pisissutissat annertunerulersinneqarsinnaanerittaaq ujartorneqarluni.

Naggataarutaasumik eqikkaanermi utoqqaat oqariartuutaat tassaavoq; Sivisuumik sulisimalluta inuuneqarsi-magutta, qilanaarisariaqarparput ataqqinartumik utoqqalinissarput soraarninngorsinnaanissarpullu.

